

四庫全書

集部

欽定四庫全書

集部

樂軒集卷二

詳校官庶吉士臣翁樹培

主事臣呂雲棟覆勘

總校官編修臣倉聖脉

校對官主事臣陳文樞

謄錄監生臣劉清

欽定四庫全書

集部四

樂軒集

別集類三 宋

提要

臣等謹案樂軒集八卷宋陳藻撰藻字元潔福清人林亦之之弟子樂軒其自號也是集為其門人林希逸所編劉克莊序希逸竹溪詩集稱乾淳間艾軒林光朝始好深湛之思加煅煉之功有經歲累月繕一章未就者盡

生平所作不數卷能以約敵繁密勝疎精掩
粗一傳而為網山林亦之再傳而為樂軒陳
藻又稱艾軒歿門人盡散或更名他師獨網
山樂軒篤守舊聞窮死不悔云云今觀集中
所載各體詩俱以清刻新穎為長古文亦主
於煅煉字句而不為奔放闊肆之作與艾軒
網山二集體格相近雖其蹊逕太僻不免寒
瘦之譏然在南宋諸家中實亦自成一派也

乾隆四十五年七月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

樂軒集卷一

宋 陳藻 撰

詩

讀莊子

堯無是處桀無非此語堪驚與道違造物恩私多鬼瑣
始知莊子得真機

偶游白渡懷劉九

心隨飛鳥過寒沙兩岼沿江曲又斜便有隻船乘月渡
都無五里到君家

寄劉九

一生閉門不結交
夤緣遇我如同胞
年年客裏故人多
飲水逢君朱顏酡
鵲去鳩來有空屋
牝乳雛飛無啄粟
香火飄零甘死休
無辜憐我兄遭戮
暗中魑魅籍姓名
我有朋儔等不足
十事上心九事忘
一日回首千日長
誰登百丈嶺我到
鍾山傍登堂拜丘嫂
攜手戲諸郎諸

郎挽衣幼女親汝母磊落如吾人哀我若見韓氏孤敬
我寧知蘇子貧吁嗟尺布謠空道天屬真

寄劉八

六度封書向小孤一度逢人寄書無劉郎嗔我無短吟
素書百紙難論心我愛劉郎可無詩劉郎愛客還答兒
我為父執倍其年見我呼兄挾渠賢撥棄勿復陳對君
吟此身憶昔在桂堂瘡鬼罹我殃世情疎客病移我君
家床兒女不辭勞僕妾何憚忙秋風黃葉飛明燈藥爐

傍我身何日殞此念何時忘丘嫂晚歲歸敬我如小郎
他年山下結吾廬朝暮往來摩白鬚我抱子君抱孫却
使相敘為弟昆

黃石還漁溪寄劉九四首

孤青湖外幾時歸想極吟孤落月知身似南飛鳥與鵲
歸來何處不相思

多少人家好弟兄不堪閨婦似吹笙十年再拜如丘嫂
更盡劉郎故舊情

老去今秋迹轉孤
憐君幼女似童烏
窮通何事關渠甚
便問明朝有試無

南北東西語別頻
白頭何計作比隣
便留久客如前度
無暇長年作主人

久不得劉九書因題寄之

劉郎蹤跡若為疎
蠡井山前似里閭
少小麻風今半愈
長成項疾喜全除
豐年誰與嘗新稻
吉日因知反舊廬
何事別君纔百里
可堪終歲斷來書

重山論易贈吳叔達

似汝論三易何人閱五車白頭長作侶黃石即為家

丹井懷叔達

喜稱吾子賦羞道少年時別去休論易愁來欲寄詩夕陽書不到殘月夢相隨晚歲傷心事松岫獨語誰

凭欄

少壯營營正苦心凭欄況味不如今如今飯散凭欄立一本寒枯木在林

桂堂秋夜

熒熒燈火臨書卷
續續蛙聲入桂林
背後曲肱眠小子
床頭酌酒服玄參

題劉氏翠微亭

舊屋紅蕖外
新亭綠樹傍
江晴孤棹見
雨近衆山藏
學圃未成趣
催詩何太忙
他年多橘柚
此地一瀟湘

誦少陵詩集

麻鞋奔走杜陵翁
卧盡風帆雨驛中
天也不愁窮
餓殺

年年催促要詩工

福州城北吳氏新樓之作

千山匝繞三山盡屬危樓一覩間雲漢星辰誰道遠
鄰家花木不容慳凭欄要取西湖盡落葉尤宜朔吹寒
況是先生莊列輩眼高人境幾層看

過黃州訪東坡雪堂遺跡擬作

謫來誰作久長居便擬明朝歸舊廬誦遍離騷情不已
讀殘鵬賦恨如初斯翁直是憂黎庶到處仍看似里閭

父老無人堪問訊黃昏立馬轉躊躇

寓居

到處情親即寓居從他相狎又相疎年衰骨肉多埋土
身賤交朋少寄書萬象去來無了日一元開闔不關渠
逢人問我今何在寥落空山誦子虛

述懷

病身四十未妻孥墟墓那堪兩世孤黃卷安貧無陋

闕

蟬井

此山鼇不動此井螭如何小阜為拳石晴田看盡波俯
知雲障下却放日輪過一上一回首層層眼界多

虎丘

竹瘦門逾靜樓高山太低白煙青樹走細雨大江迷野
水東西渡園蔬上下畦僧無城市去岩有鬼神棲

山中有感

每看風月非人世錯認江山是畫圖誰解吟詩追李杜
何須涉海訪蓬壺

城山偶題

四天圍一地濁少判清多人氣翻相敵無如俗物何

漁溪西軒

千尋好景羣峰起一抹寒烟半壁留日影漸高魚網曬
雨聲長響桔槔休種麻賣布皆貧婦伐蔗炊糖無末遊
狂客寂寥貪看月初旬已看月如鉤

紫瑞香三首

中開素粉笑濃霜外帶凝脂妬夕陽縱有寒梅祇一色

暗香不似撲人香

無數枝頭簇簇葩
大枝直上細枝斜
商量開盡商量落
全要前花見後花

放藥爭先見菊彫
逐花旋拆到桃夭
若為耐久還柔脆
莫折仙枝本易搖

丘叔喬七十生朝二首

人生七十為稀有
强健如公有幾人
況是上元燈火夜
兒孫楚楚賀生辰

大兒別有論文眼樸實無他是次丁長女嫁夫能儉約
小娘罵婿見財輕

與宗上人同飲

同年同月又同時邂逅僧房把酒卮五十年來未相識
鄰州兩舍賀生兒

試後自題因送從弟敬之赴省

銀袍二萬縱人多筆誤無如鬼魅何祇恐有司長莽鹵
那知昏病自蹉跎交遊解散文因怪門戶誰興髻欲皤

賴有阿連才思逸乘槎好好上天河

貧婦行

故人身死妻貧病買藥無錢留性命半簞赤飯一盂蔬
對不能食雙淚迸阿官賣田妾未歸稅在夫家田賣誰
鄉胥改割全隱匿妾典衣裳空被追零落生涯種片園
朝朝夜夜盜開門鄰翁苦妾妾租客客也無輸叫妾論
那更雙棺四岳灰伐山博米圖葬埋嗚呼豪強欺妾奪
山去不許鹽丁燃妾柴十歲孤兒出縣庭空手攜狀投

香冥黃堂走罷走使輶文書送縣已三月依舊含冤說
我聽

問太虛

生前百事無如意死後浮名總是空剛把窮愁作題目
哦詩不要晚年工

西窗晚眺

兩年無事坐窗間數盡西邊不老山薄暮忽迷雲與樹
驚來乍見別峰巒

海口吟

按圖自古無人到二百年來戶口添架屋上山成市井
張官近海課魚鹽估客趁潮撐米入没人忍凍采蠔粘
仲尼有廟塵誰掃寺觀崢嶸香火嚴

和林子望二絕

勸君莫要嘆無官門蔭何如自致難誰肯宦途為第二
玉階好好唱名還

勸君莫要嘆無官幸有田園在故山滿室清風滿林月

人生何事勝於閒

劉五十丈生日

與君他語自差殊獨愛交財是丈夫願見年年生日會
老來活計尚闕渠

雲菴覓詩

百級危階上翠巒四邊山色自低環海鄉無限蕭條景
收到樓前是美觀

一古一律賀嬾翁宏仲七十

醵飲高堂慶古希名存寔是節常儀百篇自號嬾翁詩
一句誰吟持卮我見前程多險巇朝聞夕可寧不怡
健如此叟更待時黃金散盡呼來歸

當年嗽卧丈人家鼓笛村村改歲華選肉必多儲胃腎
忌鮮緣不啗魚蝦閨房德義談雖切事業身窮報自賒
肺疾晚侵誰是主看君七十更寒些

次子望肯堂之什

酒樽開處是陽春有屋休論舊與新才子綠袍能賦詠

乃翁青冢亦精神人心多向醒時偽情話無如醉後真
莫要孟光同趣去急須榮祿奉偏親

陳叔盥兩惠詩以一首謝

休要逢人誦六經紅泉往事已凋零向來未壞恭王壁
到處閒搖普化鈴幾歲寒窗頭也白兩篇新什眼空青
還鄉舊識多農賈那得柴門自掩扃

穀城山下作

遠來便見兩山睽一大隆高一小低及到近看如合璧

壺公祇與穀城齊

城山讀書

雨響泉流樂不如月明松栢勝旌旗誰能五十猶勤苦
祇向山間受用書

送年

一味清貧好送年堪嗟柴炭買無錢生涯幸與干戈遠
不管天明聽雨眠

秋雨

早禾收罷晚禾青再插秧開滿眼成誰道秋風專肅殺
依然四月雨中行

林若愚七十

思我從網山問道紅泉市託翁自漁溪餉我百餘里數
窮初值變巢穴夜焚毀我恰還君家曉霜失行李君家
一物無官學吾請已艱難全信義勉強圖終始三載客
招提饋遺無廢弛薄莫聞叩門奔走勞僕使先生顧之
笑以我匹子美他時誓作銘自送此老死新春方七十

行步追鹿豕，犀斜宿草多。惆悵餘一紀，幸有活頭顱。見君松竹比，屈伸隨變化。貧富休悲喜，人生飽諳歷。熟識興衰理，身佚心鎮愚。千歲焉用彼。

網山先生諱曰寄綺伯

先生一去三十年，蘋藻聊修諱。日虔雌劍，忽尋雄劍迹。恰恰歲暮，吾無錢乃知毫髮有造化。此禮終與吾母緣。人生損益固常理，韓門仍被流俗牽。鳳毛辭采非不美，再拜焚香符水前。驅邪院中諸將吏，或書或畫縱橫縣。

網山有靈應大笑安得師友尚流傳

三教

枉費工夫是學仙聖門妙處與僧傳百年合死千年贅
一物都無萬物全

贈叔嘉叔平劉丈

士多貧者試後皇皇誰得失蓋其衣食在科舉
耳叔嘉叔平揮染而歸理生自若衆所健羨贈
以古風一首

木槽壓油三石餘半為燈火半煮蔬上山伐柴五十束
九分賣錢一燒肉等閏八月舉場歸早禾困畢晚禾稀
道行願見國人肥高才久屈當奮飛萬一主司仍見遺
課奴種麥家相宜老夫借屋蓄妻兒寂寥慣便亦何悲
丘德基七十

斯翁千歲也何愁七十真堪賀禮修多少人間貧病客
不貪天地久相留

賀丘子從遷居

老夫昨者亦遷居只是他人借屋廬道義交親無罣礙
妻孥慮遠自嗟吁廼翁能殖千金去令子均分甲第餘
醉卧市心年月久南橋依舊賦歸歟

賀子永為令郎醮婦

咿呀唱擔禮筵開無物聊堪表下懷天遣腐儒人事省
三冬不放一錢來

將有遠行走筆效江西體贈叔嘉

我非無伴侶少壯皆黃泉獨我成小巫何人呼大禪有

時欲覽月誰與為飛仙萌芽一二輩世俗輒變遷之子
略可語猶之火未燃淮浙有同調已辦青鞵錢

適武林入延平界作

人烟隨山窟家家自生理木杪插秧青泉流仙杵起開
邊憶漢皇航海通南鄙黃昏更不愁客舍連薺美

建劍風土

瞰水比連閣開山上下廬四時簞有笋兩岼鱖多魚白
亭男抽剝新絲女捲舒吾曹嗟跋涉不合早看書

除夜過延平書所見

東家兒婦試新衣
西家殘織方下機
東家宰牲嫵不肥
西家呼兒去采薇
欲掩不掩留半扉
等彼良人心依依
小兒出門看落暉
平章去時霜未晞
須臾忽見扁舟飛
雙槳擣破清漣漪
抖擻裙兒牽兒上釣磯
手掩蓬鬢漸覺面生輝
遽呼良人何來遲
稅苗更管中限違
且買豚肩連夜歸

過蓋竹祠

人心有想自然靈夢寐之間兆朕成蓋竹山前英惠廟
暗中贏得四方名

至浦城界聞武林失火而還

幾年要入武林遊今日中塗却罷休剩得紀行詩數首
前途有便是良謀

新村阻水

前途聞火整裝回又向新村值水災縱道人生為客好
這般風味稍關懷

看船

迅步如何却放遲
貪看船子下灘奇
身貧也守垂堂戒
自覺年高命未知

由建陽抵浦城界遂歸崇下

臨溪行盡却穿山
山盡依然出水間
崇下不貪歸去近
最憐山水要環看

浙漕不成還勉諸同行

此去相期泰茹連
歸來鄉舉賽登天
秋風少壯猶堪想

人開何由識老顛

擬別為浙江之行

兩浙黃緣未聊窮
福建回雪鹽晞黑
土朱李細黃梅男
子皆強鬪村姑亦
嬾腮在家無活計
此路欠芒鞋

歸入古田界作

步步谿山勝
橋亭建劍風土宜
辭荔子村塢盡油
桐南店炊初滑西
舟石漸窮豈知旬
日外便訪去時蹤

同行歸急困倦不能詩

行李放遲遲周遭好拾詩歸程催我急脚力與神疲來
往成虛費科名未有期流傳堪膾炙造物不相虧

觀漁舡水碓有感

水淋槽滿春應響人降槎登網自沉萬事低昂惟兩勢
乾坤闔闢箇中尋

建劍板橋之什

數里一板橋亭欄各清楚長亭且百間頻憇忘羈旅人
道賁乾坤溪山失其阻莊生達未充無梁思太古行行

降復登川廣湍流聚急下看飛舡髣髴聞端午

適武林途中作

道途奔走固然非閒坐真空度歲時誰解胸中無窒礙
兩隨造化不相譏

道中酒壚

千村亭榭酒旗揚收盡山光與水光風物到來城郭鬧
杖頭隨處去休忙

夜宿溪館偶成

世間多福是行人到處風光屬此身戲效堯夫吟數首
芒鞋楮蓋不知貧

夜宿延平水東二首

晚向溪西岸上行溪東一帶水為城兩山相距能多少
聽盡傍邊叫賣聲

浮橋暫折阻狂瀾嬾問津舡趣往還雙劍廟前酤酒喫
水西燈火水東看

山泉

山山迸出細泉流更瀉高峰瀑布幽盡入大溪灘石裏
古今翻覆幾人舟

建劍途中即事

山化千般障田數百級階林杉森似戟灘水呌如雷蔬
笋常供膳雞魚間有盃吾鄉多食物女慕白粳來

田家婦

蒔秧郎婿晚歸來白面勻粧是乃妻笑說福唐風俗惡
一田夫婦兩身泥

過建劍書所聞見

日夜灘聲急相忘不聞人兒孫猶棄水農圃各文身
眼出平洋豁眉逢大雨顰豁藏山脇裏遶水每逡巡

過建劍飲食

賣食鮮雖少開酤賤却醇不知天地裏何處享全珍

早下蓬嶺

烟雲深裏日攀躋嶺上宵眠雨電低清曉攜筇遵下路
高峰對面與胸齊

過江山作

叠叠青山相送迎
遶溪幽樹萬蜩鳴
我來場屋無聲字
也在神仙洞裏行

自哂

自小何曾識帝鄉
姓名却挂武林廂
祝融今歲為災甚
亦費貲糧奔走忙

看潮

何處飛來白鷺多
潮頭已減數分闕
西旋衝却東流散

陣陣將軍引戰過

重陽臨安舟中作

小舡獨坐看平洋
厯厯登高舊事長
戲把此身觀變化
今年無酒過重陽

到平江遇雨次日見元鼎揚丈

此來便擬見揚雄
席帽那堪走雨中
漫刺修成還自袖
高門許入不能通
姓名多謝曾相問
糧屨從今未解窮
孟子休須嗔樂克
無車只等日輪東

贈揚元鼎

老泉早別閩中去君在姑蘇臺下生每見鄉閭新到客
便尋香火舊來情百年念祖心田孝一種論文眼力明
歲晚已無場屋累古書真味勝浮名

平江清明書所聞見

早插綠楊簷外去晚攜黃胖杖頭歸富者幾家貧者衆
年年漸見賞人稀

平江課賦待試混補蕭中立見之有相憐色因成

四韻

吾鄉猶自哂吾徒
易道東來話得無
幸有蔡邕過爨下
獨憐賈島作原夫
昌黎俗筆何曾短
永叔文衡不到輸
多少科名成底事
聊安飄泊老江湖

鄭簿約飲不赴以詩謝之

浪遊人到北佳節
日窮南多謝棲鸞
意相期汎蟻酣桃
源迷去路玉塵失
清談寄語鄭莊驛
難逃負約慚

寄叔嘉叔平

金文四卷
卷一
秋暮家書到武林平江臘盡未聞音兒添一翼還三良
詩賦雙魚抵萬金故國桃花應爛漫北天梅蕊尚沉吟
橋門待補行新令早趣行裝慰老心

讀李翰林詩

杜陵尊酒罕相逢舉世誰堪入此公莫怪篇篇吟婦女
別無人物與形容

鄭主簿宅看雪訪梅聽僧撫琴偶成四韻倩蕭中

立書之

鵝毛散亂三朝雪烏帽沾濡六出花
梅吐萬枝香滿室
桐聽幾曲興乘槎蓬萊借問仙仇
覽人世何妨醉釋迦
騷客平生揮字拙蕭郎為我走龍蛇

呼盧

年少相看百慮無
纔過旅邸便呼盧
熱中更不知行李
却把黃梁付老夫

賦京口蘇園

揚子江邊犬吠村
蘇公宅畔蝶遊園
滄波對景標層塔

野市逃喧植外樊亭榭高低隨卉木門庭光彩屬兒孫
本朝名相青氈在傍築書齋細討論

十月一日毗陵作

聽得常州多菜色到來市井亦安然今朝正值焦糟節
車馬翩翩上墓田

題東湖林氏所居

遠來東望見門牆到後西看不見洋四面近山圍遶密
卜居如此合綿長

平江送連亨叟赴省

吾廬元在亮功坊祖母東街家姓張舅翁官小先富强
有子破蕩開書堂我隨表伯學文章忽然好怪不好常
走師月魚舍蒲陽三山士子厭我狂避我談吐如簸糠
北郭先君吳諱驤姨弟余入京朝行惟此二人見科場
期我前列每參商面嗔考官識未長我因隨老客他鄉
一錢亦欠真空囊君出鳳池遊上庠長洲適值日同房
我憶東街往事詳得君情話勝瓊漿百盃飲我何以償

欲錢一醉難賒嘗雖然旅困顏無光狂言欲發藉激昂
自矜到此亦可傷末篇聽我送行裝臨軒策試亮陰妨
首擢南宮丹桂芳奉常格法經先揚亞魁誰賦非君當
占牌前引歸騎忙藍袍色映萱艸蒼美人二八宮樣粧
閑閱貴盛金多藏愛君坦腹羲之床紅紉扇鼓迎新郎
我還盡糶簞食糧賽君痛飲尋歌娼莫學淺夫唾肥羊
傲岼賀客峻門墻

冬至寄行甫騰叔

江浙羈棲怕雪霜
早年聽得晚年嘗
生涯敗意多諳歷
節序隨緣少感傷
鴨肉餛飩看土俗
糯丸麻汁阻家鄉
二千里外尋君話
今日那堪各一方

贈王叔平

龜山與我說於潛
忽向平江問酒帘
何日龜山山下坐
共談江浙擘蠔粘

贈蕭中立

相逢知己向非無
木未逢春一樣枯
雙眼如君今有力

困窮那得到狂夫

平江臘月廿五夜作

昨日宰猪家祭竈今宵洗豆俗為糜燔柴夾水明如晝
截竹當階爆禦魑故國賽還新歲願老翁回憶幼年時
才高命薄天相戲我亦剛腸不肯悲

除夜寄妻叔劉丈

一自鄰居十二年幾番為客更從前入同飲酒柴爐畔
出看呼盧竹爆邊鼓吹兒童隨處鬧庖厨烟火幾家眠

今宵莫恨輕離別此地蹉跎豈偶然

元日平江作

草粿京糴要賀年玉融風俗不同天元正郊醉長洲市
又憶浮家厭海鮮

寄叔廣

君在於潛未語歸姑蘇我到事多違母衰妹弱那能幹
婦拙兒頑孰可依海近一天風漠漠朔寒兩地雪霏霏
行裝稍辦還家急年少應須慕虎闥

平江送王騰叔

交情早已有何蕃為我揚聲梁楚間
秋暮姑蘇身自到春來行李處猶難
十年為客思親切一第從人奏凱還
莫笑衰翁頻鑷鬢雕蟲更擬入賢闕

別平江揚元鼎二首

染指黿羹有子雲乃能留客話皇墳
不知造化何慳甚遣出平江要別君

黃菊來時正遶籬真相續到蟬偏肥
嘗罷河豚歸楫動

消梅初熟柳花飛

壬戌重午於潛李氏作

我來於潛縣知有老耒族王氣歇唐家孫支散幽谷居
然多仕版壁列登科錄生兒皆可愛大小芝蘭馥大者
初試歸兩眼如明燭小者纔讀書應對機鋒速他鄉客
重午菖蒲隨飲俗老去卧家山如夢開詩牘

土風

錢塘直出過長洲質直都無俗太浮路入餘杭昌化境

土風淳樸似閩甌

道中戲嘲朱叔緯

畏日在征途心涼不知苦青山千百態相契無相忤芒
鞋有至貴道眼開方覩行行遂吾性萬物與同祖殺雞
固不忍從衆那得阻嫩菜送香粳頗覺清肺腑同游自
疎懶共飯何嗔怒

詠快活三首

客舍寒窗月色明紙衾展罷睡縱橫傍人正是無聊景

怪我狂呼快活聲

小舡密坐頸難伸盡是飢寒不遇身快活幾聲天地裏
相看疑我是顛人

武林試罷過仙霞行路崎嶇各憶家怪問老夫何所喜
飄搖飛舞似楊花

歸入福建界作

行旅名雖惡遊山興亦深酒無官權價松有道傍陰鵝
鴨谿谿浴蜩蟬樹樹吟逍遙儔侶怪罵我失常心

甲子應舉

場屋悠悠四十年，這回弄鏡已華顛。
也知枯木春稀到，却想寒灰火復燃。
高尚難攀生有累，往來莫厭喜隨緣。
傷心自是離鄉客，幾度因歸上墓田。

樂軒集卷一

欽定四庫全書

樂軒集卷二

宋 陳藻 撰

詩

子從生兒席上作

我身如浮雲出入無程期別君夫與婦戲約歸來時夫
問婦何娠我卜生男兒出房拜阿姑我得酣酒卮遊脫
城山屐香聞漁市炊雖無童僕遣若有音信知回思一

紀先君吟弄瓦詩亦開滿月筵我行適值之親交信有
緣飲啄主者誰前言成讖兆笑訝因陳詞詩法久無辭
請繼闕雖為十九成數終陰偶配陽奇晉文在外還霸
業一朝基伉儷今幾秋倒指恰如茲造化安排生必也
非凡兒

與景晦

鄉間好事喜人傳聞說當初賦斷弦得暇灌花花造化
有方種藥藥神仙忽看脚下相隨處又是人間別樣天

數畝南園誰更管任他荒草欲平肩

丘叔喬八十

樂欲永千年愁難禁一夕大家於此且貪生八十孩兒
題向額今朝門下慶相符坐有繡衣為上客況乎二弟
古稀餘左酬右勸皆精力阿婆纔小三五秋卜婚日者
神無敵燈火鰲山弧矢晨姓名往往登仙籍借問人間
見幾多荅云造化慳斯席

丘子中生日

名卿先達陳君舉年將三十登州補袖中有啓謝主文
為緣場屋新推許斯翁自小學雕蟲性情樸直浮誰語
旗鈴絕不到門庭却有兒郎能戰取高名前日掛縣庠
引此壽觴來獻父莫嫌小勝未當論知是敘封初步武

中元連宿竹園劉叔嘉宅

朝朝風雨過中元已熟之禾未易存正是忙時人却暇
且偷佳節倒芳尊

仲秋過盧北山子俞嘗新醞作

白秫新收釀得紅
洗鍋吹火煮油葱
莫嫌傾出清和濁
勝是嘗來辣且濃

過廬北山

西成課罷赴羣居
中路誰家倦憇予
恰見主人方早起
簷前觀我所為書

盧子俞幼孫晬日

我與良翁似有緣
命名與述戰龍天
事忙不記垂弧旦
恰到渠家遇晬筵

小除過盧子俞作

今夜人間是小除歸途迂曲訪

一作過

君居村深事簡携

杯外閒把詩篇細卷舒

賀劉叔猷為用甫納婦

生平小我一金千十五字問揚雄難納幣孟冬猶卯角
記得迎長方祀冠倒指新春五十七先春女嫁男婚畢
采真園裏東風回主公無事花添色少貧嗟我老更貧
塵累何時是了人況且郎君賦語神使我見兒祇欲嗔

百丈書懷寄丘子深

離騷休唱逐臣愁
此曲思君可寄不
百歲都來如過客
一生大半似幽囚
那堪泣玉空懷寶
剛道雕蟲勝飯牛
山館無聊春睡美
日高丈五正蒙頭

紅泉明日還福清作

獨坐無聊日已西
忽經蒜嶺過漁溪
一枝何處空歸去
却整行裝羨鳥栖

誦中庸

端把中庸誦一篇眼前神物頓森然塵埃掃盡無他慮
儘管高樓自在眠

梅

野水橋邊幾樹梅歲寒款款向人開精神別帶陽春到
造化勻分臘月來滿眼松筠皆臭味一天霜雪是胚胎
看花遠地身還老買屋何年手自栽

城山

雲霧成佳景天明又幾回忽攜詩句入別放畫圖開遠

樹沉如立行歌去似來小舡衝雨過高柳接湖栽月自
孤青月臺呼恠石臺故園無夢想近擬築巖隈

壺山二首

萬古凌空孤拄軒百年那得此身存醉醒欲掃雲開眼
興逸誰歸月掩門走遍莆陽隨處有遊觀天下見人論
細瞻五岳神來舍旁聳諸山勢更尊

遠看顛狂近轉迷有才老死便幽棲咄嗟萬里雲彌合
昏黑孤城日正西北極河通千澗近中央天接兩傍低

頓令病眼還蘇醒誰向他山更品題

虎溪

四圍山木合百磴屋簷重古穴成幽井疎林散曉峰響
泉那更月啼鳥此無冬臺上朝朝看天邊處處供

過延平書懷

幾程便要買歸舟身在延平已倦遊但有菜羹供祭祀
人生何必到融州

紀夢

自從弱冠為游子玉融丹井壺山市哦詩不用著工夫
已謫牂柯四千里柳侯未五十羅池作刺史翰苑失詞
華蛟龍怨泥滓我今四十貧無官六合飄零到融水來
時三宿柳城村再拜前賢我如此才卑何怨嗟且述西
征始奔走豈吾心跬步思桑梓江右湖湘抵桂林青山
爭獻雙眸美青山縱好興不生萬斛羈愁懷抱裏夜長
正好夢征夫何早起合眼見故鄉開眼知行李交朋無
恨別親戚常孔邇天明同登途薄暮共棲止一更春酒

熟街頭逢伯氏二更桑麻園仲氏談生理三更四更平時往還人見我早歸呼我喜五更茅店寒鄰鷄振吾耳忽驚身在竹床眠天外七閩何處是雙淚汪汪沾布被

過臨川懷劉氏弟兄

臨川幾日到長沙聞道黔南路更賒行見一村籬落好誰家此住憶君家

過新喻

四顧茫茫水接天遠山如卧白雲邊馬頭忽看孤峰起

錯喜鄉關是目前

宿衡陽

一見行人一下車
行人都說異鄉居
別來閩嶺三千里
夜宿衡陽夢寄書

自哂

且安愚分住天涯
休問明朝買馬回
濠上有人留此老
去年不到異鄉來

題清暉樓

茲樓名郡郭何處別林泉一水遙通蜀千崖利插天
鷗晴舞雪桑柘月生烟欲醉囊羞澁愁看度兩年

融州西樓望山

西樓門外數峯青合看芙蓉展看屏回首東郊晴日出
千人躍馬上天庭

融州除夜寄福清劉九兄

臘月牂柯三十日相思覓句上譙樓遙知今夜柴爐會
說我無家更遠遊

題融州城樓

除却譙樓環廨舍蕭條市井客懷悲
高高下山無數
淺淺深深江有時大布紅裙徭女著
半規白扇野人持
城中昨夜亡羊豕聞得誰家虎入籬

融州望鄉

故國來來八十程登樓迷却桂州城
望鄉不分千山隔
上趨金烏日裏行

東樓夜望

愁來無酒話無人
明月樓中萬里身
說與長江流水去
汝今穿海入吾閩

客中書事

千載蠻風尚有存
此來聞見不堪論
猪膏澤髮湘南婦
牛勃塗門嶺右村
行客下床調瘴藥
吏人抱甕灌蔬園
豈無佳麗堪娛目
別有淒涼只斷魂

秋雨

梅花五鼓城頭角
吹向愁人枕前落
一聲心膽碎無餘

三聲兩聲那更作天明起坐壁為鄰簷外垂垂秋雨脚
雨脚强髣毛弱若為一滴白幾莖縱使赤松猶老却

冬日

冬日何曾短寒更有許長紅爐那作伴白髮早還鄉舊
酒誰賒飲新詩自寫藏故人思不見獨遶野梅香

冬日融州絕句

四隻漁舡叩板木幾家茅屋長兒孫天寒水淺江成路
地僻人稀郭賽村

東寧初夏得叔達書自都下來言去秋與鄉薦尋聞下第想就試上庠賦詩寄之

天涯無伴只思渠知在杭州有故廬閩嶺秋空翔一鶚
融江夏日煮雙魚合看髻鬢登科去却有髭鬚落第初
太學好還元祐體松嶺莫便賦歸歟

余融州生日

牂柯相遇說長年一在公堂一洞天清遠使君黃石老
西周柱史混元仙

春日

獨上譙樓日一迴春風桃李滿城開
狂夫欲語無人聽
呼取閒雲共酒盃

融州東樓

燈火無蠻市江山遶暗城
漁舟闕柝響野燒日頭生
雨閣千村暝天高一月行
夜樓多好景都不礙陰晴

別融州

兩年為客憶鄉關
樽酒何時別此間
今日移舟出城市

多情却戀眼中山

謁羅池廟

友人余子畏嘗以詩戲余尾聯云我合焚香夜
深坐等君頭白柳州來後余有東寧之役過柳
州界謂前詩應於此矣及泛江東還謁羅池廟
乃知行止前定

平生不作羅池夢今日還來謁柳祠
忽憶故人曾得句
鬼神先我七年知

真仙洞

洞裏清溪可泛舟
入觀洞府出高丘
老聃尸解今還在
黃帝生前有此不
滴乳解添無數
巧攜燈何用不曾
幽乾坤自大人身
小拳石空中作勝
遊

寄吳提幹

不見河南二十年
若為再拜畫堂前
來尋八桂瓜期滿
歸訪蒼梧蓮幕遷
幸對夫人如母在
喜看令子似公賢
府僚共約黃花去
業已還鄉種薄田

別王司法

維舟江岼偶相鄰還與吾翁是故人顏貌不知今日改
姓名方記舊時親少年壯筆生應貴白髮青衫今尚貧
一笑羊城聊適意明朝話別兩酸辛

題靜江

桂林多洞府疑是館群仙四野皆平地千峰直上天
舟行

衆流江漸闊百恠石如生錯聽人聲鬧空岩荅槳鳴

過桂平

嶺南大半尚鴻荒，城壁空堅草莽長。
忽到潯州江上飲，喜他風物近吾鄉。

過象州

都無一物作生涯，坊巷蕭條有幾家。
料得寒梅應悵恨，滿城開作寂寥花。

過海豐

梅花結子已紅青，歸路猶愁一月程。
忽聽兒音鄉語熟，

不知方到海豐城

除夜憶福清塘東諸友

去年除夜作吟思
除夜今年久別離
幸喜此身貧却健
柴爐更隔一年期

喜次漳浦

江灘已過瘴烟收
野象逢人自縮頭
官路十程如砥去
舉杯先賀到漳州

次韻林子衡惡夢之什

昔人賡詩不賡韻韻恐不與事相關後人未得詩中趣
賡得韻來誇甚難相逢索我一夢吟我欲可以呈孔顏
若要夜間無惡夢朝朝心鏡好頻看

憎吏行

人逢胥吏面唾欲擣其胸傷哉彼何罪造化生蛇蟲田
宅世無有妻孥腹屢空人家詞訟起踊躍時命通天性
本懷惡煎熬仍怕窮得錢即歡喜道理那能公州府珍
寶饋縣官筵席供吏賊黥且死州縣多寬容三尺既虛

設民冤訴高穹高穹不垂耳官吏屋俱豐

訟田行

樂軒世俗文不工場屋此生難遭逢百年餓死真可惜
人命只在田畝中遠行直到西融州客裝收拾來歸休
江灘象窟百無憂却陷人心危險頭海上曾琚本亭戶
日在公門騁詞訴下鄉老嫗何大娘小郎遺業孤女當
主婚老嫗貪聘資將女嫁與曾琚兒女將三十年及格
依法賣田何所疑樂軒信已因信人豈識兩家俱不仁

曾琚文約只要錢錢被何偷反訟田牙緋縣宰坐縣亭
官是堂除豈不精老胥代判為縱橫知縣依書那得平
却監媒人宋五九備錢還我錢何有提點八州刑獄使
重念八州冤曲事許人越訴榜通衢有狀不禁攔輶車
輶車曉出平旦歸千人百人周四圍車中呼入使者笑
觀感人多涕沾衣笑者笑何意吾不聰明渠不至感者
泣何為赴愬容易殊曩時文書山積難稽考胥吏依前
顏色好樂軒辭說如直弦外臺判下不改前州府監錢

何媼還吏人掌客生艱難因循六十日公事無了畢胥
徒去復來索酒需財食樂軒一片杞菊懷遂令奔走生
塵埃春雨吹散春風回奇花異卉相迎開百千阿堵何
足道嗚呼何媼豈人哉叱散胥徒吾不取抱琴橫膝眠
空齋

阿凡初冠覓詩

後人猶識前賢子祇是廼翁文字行為報阿凡今既冠
莫教只託網山名

愁夢

天作閒愁催我老
夜長猶自怕天明
日中料想先成夢
白上髭鬚數十莖

戲題宏仲飲亭酒肆

老去雖貧有酒壚
秫田自種暫時沽
閨中不解為慳婦
猶問劉郎燕客無

黃檗香爐峰

黃檗寺前猶突兀
祖師塔外別安排
香爐好是中央小

無數峰巒拱揖來

叔達及第書走筆答之

君在臨安落第時我從融水寄君詩君歸莆陽為薦首
我到漁溪錢君酒龍飛唱第才俊多健筆如君非甲科
終然學問有知己姓名不記今卑矣人靈世上如豺虎
我行厄運遭其侮白頭膠漆變須臾一面那知深肺腑
書報青山七月還開書已覺開愁顏何時七月聽君話
話我年來路轉難

擬卜居

向來為客愛塘村
幾度天邊入夢魂
恰到塘村心已嬾
不知何處立柴門

冬日南谷讀書

列岫開平野
修牆隱密林
暗泉聞雨響
寒日覺冬深
眠底孤村近
雲邊小樹侵
何須錢買屋
空寺足閒吟

夜行偶成

脚踏橫塘外
氏村忽瞻北
極動歸魂
貧姑生理凋
零盡

八十無兒住此門

汝永寓大湖以歲歉還舍邂逅喜能為具賦詩贈之

不到蓬窗恰一年空村作客遇飢還相逢喜有三殮色
況是烹魚送酒船

次韻吳推官見贈經理達翁家事之什

紅泉風俗如鄒魯易合西華數載盟莫把肝腸隨世變
常分儋石作人情哦詩豈詭文章好立教先須義利明

戲問苦廬余子畏論交何重與何輕

別舅氏

表裏真容拜跪妨老夫拱揖謾焚香凋盡雙親一輩行
兩世能留獨渭陽劣甥今年七十五花甲戊辰先戊午
若非相見皆貧苦多少壚邊好歌舞

贈故鄉人

我家已破出他鄉如連如卓方阜昌豈料囊金隨後散
一齊開鋪鬻文章我今濱死祇如許二友猶堪望軒翥

從頭借問向來誰十室九人非舊主

憶母

蕭小八娘棄我去我生方始十三年如今七十零單五
生死途分竟杳然

客中夏夜即事

上綴珠璣為屋蓋旁堆翡翠作屏風醉翁不見身貧賤
卧向涼颼清露中

久為塵事關懷因成一絕

讀書得趣是神仙未若神仙斷火烟解把老夫埋俗窟
多時不放上青天

戲簡宏仲劉九丈

明月無長好晴空有晦時君家那與我頭白似新知

丙子秋作

今年時雨即時暘用向田園每恰當刈者不愁耕者喜
似曾真宰與商量

戲贈叔嘉

七夕劉郎開小筵
細君重九病方痊
如何依舊煩纖手
伏枕呻吟到冬首
乃知貴骨真柔弱
老夫此語非諧謔
劉郎他日有公廚
節序無憂恣行樂

憫劉家竹

陳生將五十無地堪栽竹
丈人門逕深兩面千竿綠
營不好事終日眉峰蹙
二氣豈相宜此君覺塵俗
琅玕訴失所願作陶家菊
賴有徐卿兒往往知忘肉

別蔡伯珍

我本三山城下居誰人共讀艾軒書固無田宅堪歸老
縱有文章適見踈黃石出門多俊逸白頭似子去鄉間
六經正說終茫昧不遣吾儕意氣舒

客中懷劉九

丘嫂貧中出罵言途窮非負昔時恩柴爐夜雨思君處
歸共柴爐笑語喧

贈蒙中

田園尚少隱居難場屋勞勞未得官有酒羨君無一事

餘糧猶足散孤寒

讀史偶作二首

千夫合作一賢人
合數賢人是聖神
莫道眼前無孔子
一身散作萬千身

由來識後技無他
江左人材氣象豪
道理明時身自俯
見聞溢處趾空高

病眼寄子中

連朝黑雨暫晴時
山抹浮雲似畫眉
貪看須臾成底相

不堪病眼怕風吹

絕交贈伯已二首

忙忙終日暫談玄
便聽閨房惡罵傳
郎壻已灰題柱志
親闈曾教斷機賢

我讀人間饑死書
君歸市肆有錙銖
未聞良婦嗔嘉客
分遣由來造化殊

獨宿贈伯已

獨宿空齋夜雨流
對床無味不如休
論文似汝相逢少

又被塵埃鋪席囚

值事有感懷漁溪丘德基

紛紛場屋士聞見是空虛此老何曾學高懷却有書對
人惟靜默有飯即安居說到榮華事生平不計渠

姚晉卿溪閣行

南院觀溪心已清縈紆更上閣中行西窗車馬市橋橫
東窗遠山雲霧生日斜沙石淺可數半夜轟雷驅猛雨
農圃嘈嘈春水高誰得身閒延客歌醉後下堦齊拍手

長株矮樹排花柳主人更要雙眸寬去年拄杖尋長安
一行一處狂呼去日日芳園大如許買地此多直幾金
千屏萬障為墻堵西湖覽畢歸興忙川無大小人相羊
清風明月淞江有酒蘆魚賤輸吾鄉

丘景運生孫叔南生子戲贈以詩二首

齒序逢君我在前小兒學語舌初便如君未是生孫早
若比他人晚數年

兩人鄉曲是同年行坐相推日月先莫道丘公孫是女

林郎初畫洗兒錢

北風

田園移主只丘墳他邑浮家每斷魂
又向隣州為客久北風終夜夢柴門

悼網山

福清一半海為田創邑今垂五百年
僉蠻世革儒風起西塘生在網山前
介夫凜凜松筠操月魚識解文章到
黃檗休誇十二峰鳥窠白嶼空食過

夢草醺闌記末一
句閒紬足之因以

實其
事

早梅開後寒日暗天各穿百孔於杖頭欲放一時
之野眼戲題絕句跋其後

夢中只是醒時魂到老無他學著言好句特然生夢裏
醒時却費斧斤痕

試黜寄余景仁

六經不合窮稍深入場下筆無知音吐辭從實理從是
誰肯暮途生悔心臨漳推官避我筆累舉悞疑當第一

夜光暗擲那有知羣兒久處誰相識

冬日贈宏仲

愛君方始卜鄰居君又移家二里餘日裏苦無時刻到
人情便覺往來疎風霜今歲攜盃幾淮淝明年解纜初
兄嫂恩多因怨我語言雖惡敢嗔渠

題黃子正易軒

買屋移居已歷年北偏破漏更新椽忽於瓦下得易字
鑄在小刀殊駭然主人懽喜檢玉篇易也音揚飛也箋

儒生例作飛揚想符瑞壯之心益堅中間整頓安書案
此物攜來呈我看神扶頃刻聰明開便解卜君門戶換
文形上下分兩刀刀字成三意如何昔人曾解三刀夢
果把一麾時命遭正形五畫為五馬馬字依稀易字寫
屋成一百六十秋來歷無從詢鐵冶漁溪市中多學者
舉業棄之如土苴吟詩白日費工夫勸君自此知趨舍
山水仙鄉出人物課書雖少多簪紱黃生雙眼自超奇
莫遜此刀持待兒大書閣榜為易軒我更分毫細討論

名場變易須容易不到艱難過禹門

和琴薰閣

閣倚琴薰誦子虛果然少壯入鄉書未遊唐殿哦詩句
且把牙弦卧海隅有據論文須博浩無根話性合驅除
擢犀拔象塵埃裏把出重看是捷途

賀仲雨斗門

濯錦江邊唱絕強孤青和者亦夔襄歷年雖久地相遠
在寢豈止升渠堂縱能帖石防頽岼隨寓幽居供賞翫

何如是處斗門雄
莆壤萬農生贊歎
莊周笑我機械深
夏王見我須賞音
莫道白頭猶未遇
等勞一片活人心

東林春晚作

團欒四面山我住
一山裏相距能幾何
開方祇百里日月
出東西星辰運終
始雲霞千萬狀烟
雨無窮美誰云天
體大仰看全於此
窮儒治生計富盛
誰與擬新晴麻麥
秀擁戴峰巒起牡
丹芍藥歇春意濃
未已野花悉力開
白者真珠比薔薇
及寶相爭鬪何綺
靡藩籬成障幕

村墟化城市世上豈寂寥俯仰昧斯旨笑渠開欲來黃
菊日可指寒梅即艮卦為魁向年底循環無了日物物
從頭理康寧不相放卧病爾為爾

平步樓

主翁面貌不堪誇却是書中意味華因地成樓平似陟
開林見樹直仍斜竟日清幽來佛寺有時問荅覺人家
厭隨權勢貪情話筭殺肥雞愧滿車

劉驛子初冠勉以詩

汝爺十五初裹頭桂堂讀書從我遊汝今裹頭恰十五
兩載東林就規矩我身只是前時命汝家歲久無衰盛
族人快活羨汝爺汝又勝爺好情性瑩徹溫柔好性情
更須奮筆超前程苦思入神方得句才如諸舅豈無甥

叔嘉叔平既斬衰祝之以詩

大兒年十四五不知八源流於其母造化何太察小
兒十歲周松竹不知對吾休置奴婢天遣供井碓我昔
訓童多虛受人家怨愚智暗中分何以償渠願怪我自

生兒寒窗仍未睹親朋責我苛誨之非莽鹵易教委虛
談過庭祇取笑誰將蝴蝶飛勒作秋蟬叫廼舅久從游
村巫語又聽身死欲葬埋發掘安可憑兩世太平山此
墓何人主有房既分派無息堪應舉農商攀不及矧乃
君子儒生前聊爾爾沒後真卑污他日主我喪通經得
兩郎試之以巨創整整到大祥願汝且康健送我歸山
崗

貧病

正圖奔走救寒饑喘噉那堪力已疲意是無錢休買藥
情知有命不求醫舊恩莫報空懷念新識相逢淡更宜
多少貧交書畀我觸來又得一篇詩

李氏園

開方數畝地委曲多門墻咫尺闌闔間縈帶谿山傍入
巷見顏子簞瓢想淒涼變化若夢中忽成摩詰莊主人
華副實好遊心不荒引水灌花木築墻收稻梁六月無
暑氣池臺足徜徉日斜留客浴清淨如寶坊迴迴過天

象艷艷流坤光暫來吟未到留歸作者囊

試黜題盧子俞所居

門外冬青八九株去去株間各丈餘晚禾翦穗上困儲
黃蘗堆兼綠葉居老夫晨出觀道腴攜筇邇迤來東廬
世界在前君悟歟饑寒火宅飽華胥主人慰我下鄉書
謝之養生祇業儒雖然鄰酒欠錢沽粥飮可以供朝哺
四壁雖然一物無半年聚稈為薪芻但愁賦稅吏追呼
鞭撻白丁省限踰

歛石堂頭有老夫善排遣之語因答以詩

本來無悶可消除生死窮通一任渠若到于今更排遣
讀書何處是工夫

伯溫索詩賀令姊夫生朝

一生開講度殘年糾者勞勞與辦錢恰似叢林充化士
歷多世態得真禪忽教衰老親題疏也且低垂敢自賢
隨順却遭開眼白屈伸誰識草經玄官催租賦鞭笞急
家乏樵蘇色語煎節序酒殽雖可廢妻孥溝壑恐將填

不成底事空歸去別問良媒解倒懸樂內太深顏氏子
生朝索賀郭郎篇

謝丘伯已送酒芋

二劉兄弟雖可語其如斛面已尖量天差一婦各監係
跬步不容越隄防羨餘置產晨夕忙老夫押花亦歸疆
縉紳意態生堂堂苞苴來往堪嗟傷僕夫方遣邸音到
疾足追回他送將跣趺禪伯坐高堂棒喝驚人宗旨揚
東家小兒迪功郎羞茶饋乳分名香先生方寸古書藏

有時夜半開晶光溫故知新滋味長欲傳對面無承當
蹲鴟三十新酒芳忽然餉我非世常何以報之愧空囊
百尺竿頭與翱翔男牽女挽細君狂不放逍遙隨老莊

聽雨

逋負關心糴穀償麥苗準擬貼春糧連宵不寢聽微雨
錯喜簷花滴數行

元夕同社衆攜燈上山謁神祠

城中簫鼓鬧鰲山燈火千村別一般今夕崔嵬行樂處

向時模倣仰頭看

聞雷

先春三日已聞雷
驅得長空一雨來
莫問陰陽今失序
曉園且喜趁犁開

壽山種柑命名學圃

數畝崎嶇帶寺傍
水顏沙石古來荒
住山有道神通現
學圃成蹊鬼魅藏
每隔歲華留碩果
早從春事媚幽香
黃橙綠橘真堪詠
勝是長年引興長

題林仲雨皦日庵

詩仙庵未作與我話庵名素髮來為客朱甍始落成變
風情性語皦日死生盟君老身猶健雌埋一劍橫

用余子畏韻其詩有警句云若知瓦礫真成道便
覺珠璣不屬君

少長城闌老一村平生好語不曾聞百年馬鬣空埋我
三載鰲頭更祝君幸有鄰僧分隙地豈無座主識雄文
須臾忍死攜筇立更看崢嶸足躡雲

聽吳畢聞講杜詩今夕行因效釋子偈體成一絕
春秋皆賤事無褒莊子思之意若何下筆便為齊物論
大家命酒且高歌

草

幽景

山

幽景

山

幽景

海吾鄉備移供不厭餐恰如行建劍幽景享多般

樂軒集卷二

欽定四庫全書

集部

樂軒集卷三

四

詳校官庶吉士

臣翁樹培

主事

臣呂雲棟覆勘

總校官編修

臣

倉聖脉

校對官主事

臣

陳文樞

謄錄監生

臣

劉清

欽定四庫全書

樂軒集卷三

宋 陳藻 撰

詩

次韻回叔經

從來剽竊為場屋直是無繇識古書
屈指罕能官顯達到頭剩得腹空虛
君今身計非謀祿地有人耕免荷鋤
高適學詩年更晚才名何患不相如

喜雨

年登猶藉米船通去歲那堪一大凶人死多因饑後疫
秧焦爭值北來風晴空又似驕陽起罄室誰支此患重
甘雨連朝雖未洽蔣田漸喜澤邊農

詠陳和伯母墳嘉禾芝艸甘露之祥

慕親五十歎姚虞况是行年六十餘方執母喪啼若孺
雖居禪制飯猶蔬天存屋漏人純孝曉到墳頭暮倚廬
芝艸嘉禾甘露應少為嫠婦解生雛

除夕

歲晚民貧百物廉無錢堪買亦何嫌聊將送酒呼鄰客
淺飲三杯不用添

廬北山元夕

社屋相忘鼓笛鳴空村步月興堪乘何須更要鰲山立
野燒天邊勝看燈

遇事有感

命薄世仍貧如何避苦辛姓名聞有我忠信話無人哭

死堪多舊論交笑一新聖經誰可愛場屋散天真

橫江亭

東注流求日本波西吞金翅玉融河好開亭館延三益
橫截江潮看萬艘此是人烟生巨海莫辭鮮食送新醪
網山勝處名賢迹隔水相迎立兩坡

剪春羅

隋時宮女逐流波尚有精魂在處多待到百花零落盡
從頭子細剪春羅

送郭定夫

相看無可分遠適無可餞但向主人家杯酒時同燕交
緣何太淺春風方識面子行歸有期我老魂將變後會
信難思雖在殊州縣史遷南北遊值我鄉邦彥話間及
死生亦足知深眷石城伴梅福共祝天和練

送張謙父往潭州

八卦重來夢一周人生更得幾年浮看君矍鑠猶堪展
似我龍鍾只合休淮廣早供詞峽興湖湘留與髯霜遊

還鄉試問同庚客剩有頭顱話舊否

書懷奉簡張謙父

浮家官道傍日夕逢佳客無錢可用丹有眼非開白今
春寧遠適往歲多慚色一飯不能酬饑來祇乞食才華
張八老老味幽居僻邂逅出新醅慇懃如舊識燒笋美
鮮嘗買羊甘貴直畦蔬遶舍生園果亦堪摘看君雖貧
士與我同庚衰夫何造物偏格我強其力

贈余子畏

相識紅泉舊日多年年地上漸消磨眼青好我今無幾
頭白逢君喜若何縱道索居無伴侶却能默悟自雄豪
細君掃去床書怒笑荅為儒合詆訶

子畏和云世多畏
路嗟予怯天有危

機奈
子何

子畏惠詩用韻酬之

老慵祇合在雞羣變化那能慕海鷗壯歲親朋多死別
窮途造化與生存欲尋衣食愁無路却被妻孥怨少恩
健筆期君今落第相賙未得刺空論

送蔡伯畛往潮州四首

迎侍雖然勝左遷，戀鄉畢竟怕離筵。
讀書不合能譏佛，罰向潮州住幾年。

聽說漳南象窟間，如今行路不愁難。
黃茅青草無人處，多有軒亭好卸鞍。

似我生男父合貧，腰斤嶺上解求薪。
君今有子為官去，何憚攜家踏路塵。

向來一夢兆孤青，還記伶俜過驛亭。
今日此行非昨日。

他時歸騎想掀騰

問吳叔經病

向來風月已傷多
誰料中身更被魔
萱艸別非資灌溉
桐音何事不純和
人倫自古無娼妓
世態憑渠暫笑歌
若是此身能解脫
掃除藥餌病消磨

贈高待聘

某自為童子居城郭間多見老儒奔走窘急之
狀皆是強壯聚徒鋪席鬧熱者及觀其下筆則

已顛倒錯亂實有取窮之資今吾兄年高而才益壯乃亦在若人之列此向所未見者兼自及晚途親朋凋落亦無援助興感于懷遂成古風奉呈

待聘先生二十六弟子滿堂脩幾束下床一麵月幾千有客市廛錢別錄為兒不誦杞菊篇舉筋欠魚須要肉老夫弱冠奇一秋飄零來問君平卜先生稱我有雋才滿縣青衿皆拭目一日僅能赴三飯折簡叩扉知幾幅

今夜酒移明夜醉凌晨乞展黃昏速四邊延我入師席
席則有餘身不足高子行年已若干更度四期心從欲
月錢祇直曉點心薪蔬盡此攜兒畜抱書誰肯訪吾門
看君有是猶霑祿井泉比舊百倍深汲人綆短無麻續
時去技精分愈窮時來淺學難逃福販商射利偶贏餘
便詫巧謀能潤屋莫待黃金當散時舟車到處遭顛覆

龍嶼偶作

年少彎弓中鵠心到頭衰暮也沉沉有機悟道書篇嬾

無事關懷睡思深
跋扈笑非當日態
低回靜向此山吟
撥來自有洪纖韻
牙是天工我是琴

夢故人

死生休道隔幽明
夢裏相看話舊情
幻出他誰真面目
莫教總是自心成

黃景詠七十

我纔弱冠出鄉閭
日漸回頭舊迹疎
惟有鄉閭才德士
記在心胸如記書
老來乍作龍門客
臭味訝君多似渠

講論前輩三數公果然少壯皆羣居因話隆興乾道事
恍惚此身棲故廬廼知場屋非巨網却放鯢鯨為逸魚
不得浮名須得壽人爵何如天爵有談禪會意一二言
遣興成詩千百首氣清形瘦力不羸緩步登臨快如走
夕陽曉雞神愈健端坐縱談誰解糾今春七十休計年
此是仙人識否生平但看神仙手何曾把錢弄升斗

黃景詠夫婦七十

身形清且瘦乾坤一竿竹欺雪可十年必壽先五福易

道古難全陽九配陰六先後期月間唱隨來相逐夫天
君職間婦地臣勞服觴詠恣優游生理閨房熟今春古
稀會元夜增和淑二老出勸酬笑談相往復織女戲牛
郎輟耕歸辟穀仙翁荅王母蟠桃真勝肉

薌巒

香山白樂天香草荆屈平釋氏定而慧道家直且清儒
臣司燮理至治薰神明不然岩谷間亦作蘭茝馨郁郁
若沉水茫茫夷島生人從韓壽徒去就焉知輕詎如賢

達門氣類全精誠鮑肆不肯入結交皆羣英男以芳自
持女以烈主盟時雖付衰歿久亦騰褒旌自古葬枯骨
阿誰埋令聲所以薌巒上遺芬始崢嶸一字可為謚雙
魂無愧情寧馨把仙桂已在月中行迺遷銜雞舌筆花
對長檠紫薇引當坐紅藥歡相迎

送郭定夫往江西二首

去年誤作送君詩却又論文得幾時今日溪邊成話別
榮歸早赴北堂期

石城少府自公餘拄笏看山問老夫向道封胡羣從宅
馮生不到食魚無

送黃欽之赴廣州鹽稅三首

地氣周遭逐處流五羊漸已似中州海風吹斷山無瘴
炎月何妨作宦遊

莫嫌征稅太喧卑尺蠖將伸用屈為好趁江西趨召命
此詩兼送入京時

一族名家叔度孫同時入嶺五華軒使臺帥閩終須到

官職高低且暫論

謝丘子中惠詩

高叟生來五十年方知弄筆學詩篇此翁甲子才奇一
吟詠看看到適邊

寄黃景詠

仙翁早歲學吾鄉我到衰年客仞牆柳下和風今有惠
江西詩派又傳黃幽居衆仰仁山靜默坐身回佛日光
人世大都如夢覺雖然如夢話難忘

暮秋閏月平步樓口占

恰已論心四十秋，朱顏化作素絲頭。
種田有穫須知足，應物無貪亦寡尤。
浮世欲回殘夢未，男兒休管讀書否。
任他門戶隨時變，尊酒相逢且勸酬。

西軒罷齋暫別先後進諸友

菜羹脫粟布襴衫，酒肉隨時亦飽酣。
生理傍人那得見，泉源在我久彌甘。
此身可是陶成器，來學須教青出藍。
若要參禪垂一問，也勝削髮禮瞿曇。

顏伯溫生日席上口占

今日開筵賀始生來年今日辦西行後年壁挂登科記
今日人看指姓名

送穀准羊肩賀伯溫

曲江宴罷注官旋親舊肥家有酒舡我老學農雖未遂
穀分一石准羊肩

西宮中夜聞紡聲

半夜俄聞踏紡車鄰人如此解勤家東奔西走方來憇

驚覺真知何處邪

別林肅翁

吾鄉人士多游江浙其取青婉白便以資身肅
翁此行乃一鳴鐘矣小大隨扣榮駟橋歸亦分
內事然吾人以退為常且作羈中寂寞語以餞
之云

滿懷裝貨出門前多寡相酬應世緣取友無他惟會理
逢僧祇此是談禪樂生箇裏真慚愧用向稠中足裏纏

便謝化工分付足莫言行李去蕭然

讀東坡玉糝詩因成一絕續去年芋莖羹後寄丘

林陳三友

味有酥飴出自天芋成玉糝却同然此羹若使東坡見
尤怪枯莖化得偏

六月望夜紀飲

年老聊依年少遊月圓庭上似中秋舉杯問月爭多少
一度猶行甲子周

贈許秀才

祖工儷句集刊行業販儒書乃父能莫恥向人傭作字
世裨文教後須興

寄楊南仲

君思家世質云此閨閭華我知財貨裏自出人驕奢先
翁非勤儉安能美生涯兒郎不鼓舞造化無萌芽從今
君已悟拈骰入諠譁結棚粧俚戲達旦聽淫哇

書子誨所寄詩後

搖膝支頤體漸康
入門已作白家香
從今休傍官人俗
但向林泉呼二郎

詠子誨門外荷花

門外芙蓉未肯花
西風彌月露多華
我來為客如相約
細沼同時十一葩

朱叔清小樓謁名并詩

望舒雖是月
借作此樓名
收爾萬家地
歸吾雙眼明
規模成巧小
景物散縱橫
人若無高見
虛空柱謾擎

叔清留飲座上感懷

十夜不相見一見又如初兄弟無人在交朋却我餘矣
弧皆後挂銘旒競先書有酒堪留客悲懷且掃除

歲晚朱叔清樓上談詩話佛飲酒聽琴作

歲晚家何處因循未得歸本無愁可遣寧有佛堪依翁
子談佳句郎君撫妙徽剔燈聊共醉明日又分飛

謝余子京驤惠詩

書同學厯夜觀星壯日情親忽老成莫恨異鄉相見少

一來人物一番更

遠來無物示拳拳到老生涯尚闕然坐久但貪情話好
又勤雞黍費囊錢

題吳景恬寫三傳正後

叔謨子

乃翁催我傳春秋及我書成已合眸有子傳家何可憾
夜深燈火問東周

謝王爾瞻爾中惠詩

兄弟初年事網山髭鬚未出正童顏我方盛壯今羸老

多謝新詩敘舊懽

久不到黃石故人相見多喜余紅顏吳世執友喻
之霜柿謂其熟而將墜也

年將四十客莆陽卅角相看笑語長今日生男行冠禮
老如霜柿又逢場

謝余薦鴉聽易惠詩一首

向得追隨父祖間此來重結子孫懽自嗟三世須臾見
不有餘生會遇難詩社已收風月美舉場祇用粃糠殘

百錢聊買時文看容易如君直換官

和林君作起叔梅詩韻

林逋沒後幾星霜苦要吟梅弄燭光
兩處湖光看共色一家詩句嗅同香
花開再約談玄白鴛老那能逐乘黃
又恐來冬隨計吏仙霞不管似羊腸

劉驪父生男

生來長誦老夫詩那可無詩慶浴兒得
巽曾吟吟是識果然先偶次從奇

賀叔嘉生日

一子累輕婚事畢如何學易已皤然天無快活除君壽
任待皤然也百年

賀劉直之值改官

公車五刻得京官俗態營求有百端但看樂昌劉令尹
了無一語汗人顏

里人歡喜看榮歸兩僕藍輿自有輝勝在宦途無事業
但將裘馬詫輕肥

少年場屋有程文但見高才迥出羣今日江邊看道骨
世人涵養罕如君

日者紛紛步五星諸儒言命亦相承大人雙眼如明月
照出毫釐不肯憑

賀丘煥翁南歸

三十年前八桂歸西江舡上每吟詩迺翁收拾傳尤切
令子經從是果非渡海却休賢季路論文想勝謁羅池
此行況有如臯雉藥裏拋來自畫眉

劉公父新理花畦約賞菊因成樂軒行

舊屋早易主新椽辦無錢
帡幪託親友蹉跎經年碎
累入安宅隻身出隨緣
引腹挂蛛網移簷餌羽鮮
所愧
歷游賞不勞攜饌筵
美名吾敢僭茂實衆推先
但名長
樂郡誰擬地行仙
玉融未遍眼銀髮久垂肩
何況縣十
二欲周里數千軒
齋或寄食宿食輒留連
公父白日暇
後園清興牽種花成趣
易席草覺情宣犬雞交
巷陌風
月自林泉
匝山圍野晴明霞散天
紅莫把雖過黃菊

采猶憐詠我昔文賦泛渠今酒舫

清暉行

主翁不解飲安事園池遊從知蓮社侶所樂在清修我
憶少壯日未多禪悅優獨醒對佳景愁紋上眉頭四方
觀唱禮文辭旨趣幽我膝固不屈彌陀暗相投葉吹光
亂轉花覆實泉流此外無國土靜中反身求湛然真賞
妙誰肯尋糟丘

宿清暉

禪家自古分人境心地明時境始明榕樾交陰牆內外
卉花散采路縱橫築臺勾引江山入鑿沼因緣萍藕清
好是炎天亭上宿便為淨土國中生

經鉏

兩間陋屋勝經鉏經是心明鉏是蔬種果始初花可翫
遶牆藤蔓實堪儲若能棲止身為鳳何必奔馳食要魚
人見此間無五畝誰知藝圃本寬舒

過盧子俞

番番留我殺雞多老齒如今不奈何本是年凶甘隔闕
論情非為酒來過

賀王嘉玉生日

九袞初開二鄉間敬老成今朝壽者出明日聖人生孫
重勞昏嫁奴猶課耨耕乾坤無暫息翁嫗合營營

次韻林君則惠詩

湖水當門四面山旁羅書史坐中間他人共我何曾有
造物於君本不慳況是早教緣累少便知晚興歲時閒

餘糧摸得鮮魚煮大勝簞瓢陋巷顏

感舊

憶到渠來憶到渠滿懷無限不刊書獨行總是同行處
剩得長年剩得吁

鄭汝則七十

少壯同時事網山幾人別後鬢能斑古稀慙愧今餘四
君已平頭一醉歡

贈陳伯融夫婦

才子治春秋推尋命氏由果然佳偶遂夫豈俗人猶話
自文章出身從勤儉修老夫歡喜見舊與兩家遊

辛巳大歟

村邨無米歲何堪我到家家有酒酣自昔略經三兩度
似今未見大生慚

辛巳歲暮宴陸甥子由家

吾妹嫁時狼狽甚幸皆存活得年深有男買屋棲遲喜
見舅開樽爛熳斟歲值凶荒多餓死我慚溫飽更酣吟

還鄉日少生難保敢覬今番一話心

辛巳歲晚上墳

偶然空手出州城薄有田園住福清晚得次男陪筆硯
秋隨舉子省墳塋過淮不擬成僧去挂紙誰能接跡行
多少隴頭無祭祀此來猶喜剩餘生

嘆問塘東一二新舊

數畝荒田不解耕老年場屋又無成更堪風雨飄搖甚
告放渠儂與養生

閱世

道理初從紙上求，因而處世得優游。
于今但閱人間世，自有文章筆下流。

辛巳秋後訪盧子俞作

本是吾鄉少富藏，五年亢旱太難當。
麥苗俱盡村如洗，蔬芋全無市亦荒。
笑我擬為饑芋去，訪君那得酒肴嘗。
更生一見真歡喜，忍聽他人尚絕糧。

食粥絕句贈盧震夫

古甕大椀今無有特地凶年洗出來滿著十分牛乳粥
客思喫盡鬼神猜

戒買墓石人

盜拆鄰墳築已墳價廉石大且輸君莫教孫子無如我
自折年時也易聞

楞伽經

若向他經義已詳此難成句也何妨昔人誤點經文會
更不回頭狗故常

過桃枝嶺

兒童嬉戲向北鄰長見桃枝出郭人
七十五翁方過嶺回頭舊事總成塵

九峯過重陽

笑來七十五重陽無酒今朝對菊黃
記得蘇杭船上坐一番醒眼詠詩章

登高却是今最高九峯寺上誦莊騷
茶話恰宜湯餅素滿身風癢怕村醪

謝鄭如之送酒初十日

俗緣不許伴僧齋
錯喜重陽避酒杯
誰擬衰翁對衰菊
黃昏猶有白衣來

謝九峯升坐相留

重陽七日月當圓
高坐禪師祝萬年
夢裏五更聞齒錄
凡夫有罪是貪眠

贈九峯老

佛土仙家本一般
松菴海上住三山
三三演出奇峯九

生氣元來萃此間

九峯僧房看山

寺前寺後木鬱環殿裏莊嚴佛一般
衲子開窓還禮拜
生株何用巧彫殘

九峯看菊

平生尋菊未曾遭直上成叢一丈高
幾處禪房驚老眼
滿堂佛像自森羅

送陳智叔舍人赴召

紫袍入手閨兩周黃紙除書作郡侯後薪莫訝還居上
巨魚直是能吞舟蕭何乃知天下信魯人祇道東家丘
到了公評難嫉忌遠皆敬服近何尤器識高明官令顯
羞作軟媚隨波流膽略肯因權勢屈事機果中日前籌
鴻飛似退正仙翼不著不龜心有睥兵形敵計何英識
脈絡豈從經外紬友于根自惟孝發論語尚書政所由
君於骨髓已先得字是皮毛剝便投強收老淚且分袂
情共斯文苑囿留

吾鄉有李明府其伯子襟懷夙然世表某早知敬
慕長誦諸人今老矣輒韻之以貽其子孫云

廟食於莆李長者變海為田散郊野福宜孫子百千年
家甲三山總文雁西城一位京朝郎官雖未顯善聲揚
伯曰孝純遵義方潘安容貌心蒙莊幼小樞趨父執時
挂口何曾聞是非到了交遊如一日肯學世情隨盛衰
我頭半白言稍傳晚出要教識前賢睽遠莫能修世契
擬將下筆無由緣喜今有便歸鄉多吾姪春中偏飲和

老去舊懷因稱敘吉人與就幸如何滿眼各為君父子
誰憂平地起風波

歲除僧寺看寫疏作

元正祈禱萬千般縱道聰明聽也難料得鬼神應喜我
不曾投疏一相干

首正有感二首

憶昔吾鄉入首正袂衣街斷小書生紫衫來去今無幾
恰似當年冠帶行

聽說從前我未生知書不許袂衣行
平時街上齊冠帶
況是人間歲節更

口占寄林子六

君則

日月相催不放遲寄詩又是去年時
近來未省開懷否
還似從前尚皺眉

寓故里大中寺值朱起蔡同宿數夜

壯遊初到鄭公鄉與子吟哦古佛旁
老去同時人死盡
那知來此話僧房

上東山墳寄敬之弟

東山零落古三丘力薄那能抑得周
賴有阿連霑寸祿我慚到老一來休

癸未生朝驪父公父以酒殽而華其陋賦一絕

家貧何敢話生朝多謝開尊慰寂寥
要跡一盃辭不受但需拙句作瓊瑶

中秋

詩書讀罷問耕牛待得時來死便休
一帶空村無潤屋

聊因社肉作中秋

次韻源仲八丈日理之作

眼中皆道境牆內是君家樂處元無盡吾生任有涯

賀四五姑七十

壯歲貧而旅無家可語歸見多延酒饌躬為補裳衣頭
白諸親忝心丹百事違何堪持報德但喜母年希

艾軒老先生文集刊傳上以揄揚其問學下則得
佛家以法布施之意前後數君子有是志而不

果今日薄西山幸一見此喜成古風三篇以賀
後來之有作者且述下悰云

老艾先生歿駸駸四紀年衣冠常嘆惜文字合刊傳東
巒乃猶子遺藁掇拾全綱山雖上足無刀堪雕鐫從遊
今殆盡錄藏多散捐裔孫肆君應發憤起收編甲集且
流布俸微難得錢晚春題壁去名姓輝藍田製錦增廩
給乙丙尋踵前搜羅必盈十但祝君高遷我老不可待
權輿已欣然

夫子刪詩去流年近二千何人悟菜菔此老獨遺筌活
鯉收入袖化龍騎上僊傍看休發問無語堪相傳假令
託忠恕投塊荅僧禪依前提出後未誰知的然給還上
手契各認落江田

蚤歲過玉融悟逢陳叔盥曾待艾翁來國風話長短忽
聽誦采蘋玉川茶八椀因入網山門多舍莆陽館今喜
文集行源流心事滿頭顱七十六見此抑何緩百為信
有待立志如君罕良晤向三山夤緣非偶款

樂軒集卷三